

DOMINGU XXVI TEMPU KOMÚN – TINAN B

Tema

Liturjia Domingu da-26 Tempu Komún apresenta sujestaun oioin atu fiar-na'in sira bele purifika sira-nia opsaun no integra, ho forma nakonu no totál, comunidade Reinu nian. Sujestaun ida importante liu (ne'ebé leitura dahuluk apresenta no Evanjellu rekupera) maka fiar-na'in sira lalika pretende katak sira mak iha ho modu eskruzivu lialoos no dadi'ak, maibé iha kapasidade atu rekoñese no aseita Maromak nia Espíritu nia prezensa no hahalok liuhusi ema di'ak barak ne'ebé la pertense ba instituisaun Kreda, maibé sai sinál Maromak nia domin iha mundu nia leet. *Leitura dahuluk*, hodi apresenta Povu nia marxa iha rai-fuik maran, hanorin katak Maromak nia Espíritu huu iha-ne'ebé nia hakarak no ba sé nia hakarak, no la iha regra, interesse pesoál ka priviléjiu grupu ruma ne'ebé sai limite ba Nia. Fiar-na'in ne'ebé loos mak ida be hanesan Moisés, rekoñese Maromak nia prezensa iha jestu profétiku sira ne'ebé nia haree iha nia sorisorin.

Iha *Evanjellu*, ita iha instrusaun ida ne'ebé Jezús fó atu tulun eskolante sira tama iha lójika Reinu nian. Nia konvida sira atu sai comunidade ida, lahó arrogánsia, lahó laran-moras, lahó prezunsaun posesu lialoos no dadi'ak nian, buka hakohak, apoia no estimula sira hotu ne'ebé atua ba maun-alin sira-nia libertasaun; konvida sira atu keta esklui husi dinámika komunitária sira-ne'ebé ki'ik no kiak, konvida sira mós atu fokit sai husi sira nia vida sentimentu no atitude hotu inkompativel ho opsaun ba Reinu.

Leitura daruak konvida fiar-na'in sira atu keta tau sira-nia konfiansa no esperansa iha soin materiál, basá sira sei mohu no asegura moris nakonu ba ema. Ida tan: injustisa sira ne'ebé ema sira akumulá soin materiál nu'udar finalidade ezisténsia nian halo, sei hadook sira husi comunidade eleitu Maromak nian.

LEITURA I – Nm 11,25-29

Livru Númeru sira nian (hanaran nune'e iha versaun grega, tanba komesa ho lista ida resenseamentu nian hodi fó número membru tribu ida-idak Maromak nia Povu nian) apresenta konjuntu ida tradisaun sira-nian – lahó preokupasaun boot kona-ba koerénsia no lójika – kona-ba ebreu sira-nia estadia iha rai-fuik maran. Ne'e tradisaun sira husi orijen oinseluk, ne'ebé teólogo sira husi eskola jahwista, elohista mo saserdotál uza ho finalidade katekétiku.

Iha ninia estadu atuál, livru fahe ba parte tolu. Parte dahuluk narra kona-ba laron ikus sira, Maromak nia Povu nia estadia iha Sinai (kf. Nm 1,1-10,10); daruak apresenta, ho etapa oioin, Povu nia dalan iha rai-fuik maran, husi Sinai to'o rai-tetuk Moab nian (kf. Nm 10,11-21,35); datoluk apresenta comunidade Israel nia oan sira instala iha rai-tetuk Moab, hodi prepara atu tama iha Rain Promesa nian (kf. 11,1-36,13).

Livru ne'e maka katekeze ida. Nia hakarak hatudu katak Israel nia esénsia mak Povu ida halibur hale'u Jahwéh no Aliansa. Autor sira hakarak hatudu oinsá nómade sira ne'ebé sai husi Ejitu hahú manán ho modu progresivu konxiénsia nasional no relijioza, to'o forma “assembleia santa Maromak nian”. Iha rai-fuik maran Israel halo mós dalan espirituál, ne'ebé halo nia liberta an

husi mentalidade atan nian, atu manán kultura liberdade no maturidade nian. Autór hatudu oinsá, hodi Maromak nia asaun, sira sai tasak ba daudaun, nakfilak no haluan sira nia orizonte, hodi sai Povu ida responsavel, konxiente, adultu no santu liután.

Epizódiu ohin nian akontese liutiha sira nia partida husi Sinai. Iha fatin ida hanaran Tabera (kf. Nm 11,3), Povu revolta tanba la iha ai-han natón no murmura hasoru Jahwéh. Moisés, kolen no iha deziluzau, hato'o ba Na'i katak nia la tahan tan ona atu lori naha-todan atu gia Povu ulun – toos ida-ne'e ka rebede (kf. Nm 11,11-15); entaun, Jahwéh propoin ba Moisés atu hili kataus 70 ne'ebé, hodi Espiritu nia kbiit, sei tulun Moisés iha knaar atu lori sai Povu liuhusi rai-fuik maran (kf. Nm 11,16-24).

MENSAJEN

“Katuas” sira “tzequenîm”) mak instituisaun ida iha universu polítiku no sosiál Israel nain. Sira mak “ulun família nian” ne'ebé iha sidade ida-idak sai hanesan “konsellu” no prezide comunidade. Ita-nia testu lori inísiu instituisaun katuas sira-nian ba Moisés no rai-fuik maran. Iha perspetiva katekista bíbliku nian, sira simu Maromak nia Espiritu atu kolabora iha Maromak nia Povu nia governasaun.

Tuir autór, Moisés iha Espiritu tomak iha nia bainhira nia mesak mak dirije Povu Maromak nian; bainhira responsabilidade governasaun nian fahe ho katuas 70, Espiritu mós fahe ba sira hotu. Atu dehan, husi parte ida unidade Espiritu nian no husi parte seluk Espiritu hanesan fó ba sira hotu ne'ebé Maromak bolu ba misaun ida.

Espiritu nia prezensa iha katuas sira manifesta liuhusi kapasidade atu profetiza. “Profetizmu” iha-ne'e la'ós profetizmu profeta boot sira-nian maibé estadu entuziaszmu nian, éstaze, delíriu koletivu atu kria klima fervór nian no ezaltasaun relijioza. Iha tempu ne'ebá, manifestasaun hanesan ba sira hanesan sinál prezensa Espiritu Maromak nian.

Hasoru Eldad no Medad, katuas rua ne'ebé la tuir selebrasaun simu Espiritu maibé hahú profetiza, Moisés nia resposta ba Josué ne'ebé hirus mak nia hakarak Povu tomak sai profeta no Maromak nia Espiritu horik iha sira (kf. vers. 29).

Moisés nia liafuan hanesan anúnsiu profétiku ba loron Pentekostes nian, bainhira Maromak nia Espiritu tun ba Povu Aliansa foun tomak (kf. Act 2,16-21).

LEITURA II – Tg 5,1-6

Surat Tiago nian hotu ho bloku rua ezortasaun nian atu moris nu'udar sarani auténtiku. Tuir autór asesu ba vida depende ba opsau emalo.

Bloku dahuluk (kf. Tg 4,11-5,6) kontein lista ida atitude negativa, ne'ebé fiar-na'in sira tenke evita ho kbiit tomak: ko'alia aat maluk sira (kf. Tg 4,11-12), moris iha orgullu no autosufisiénsia iha Maromak nia oin (kf. Tg 4,13-17), moris de'it ba soin materiál sira no pratika injustisa hasoru kiak sira (kf. Tg 5,1-6). Bloku daruak (kf. Tg 5,7-20) kontein lista ida atitude pozitivu sira ne'ebé fiar-na'in sira tenke asume enkuantu hein Na'i atu mai iha pasiénsia, perseveransa, firmeza iha ko'alia (kf. Tg 5,7-12), orasaun (kf. Tg 5,1-18) no preokupasaun atu lori fali iha dalan loos maluk ne'ebé hadook an (kf. Tg 5,19-20).

Testu ohin nian mak hakilar profétiku ida atu denunsia ema riku sira, sira-nia orgullu no autosufisiénsia, sira-nia obsesaun ba rikusoin materiál. Testu ne'e tenke koloka iha quadru jerál époka ida dezigualdade nian: iha sira ne'ebé riku la sukat nian no laho limite nia sorin moris sira

ne'ebé terus no kiak rabat rai. Explorasaun ba ema kiak sira no violénsia hasoru ema ki'ik haraik-an sira, maka fenómenu ne'ebé mosu beibeik iha tempu ne'ebá.

MENSAJEN

Parte dahuluk testu nian (vers. 1-3) trata problema akumulasaun rikusoin nian. Autór, hanesan iha vizaun profétika, kontempla tempu ikus no haktuir, ho violénsia, sorte ne'ebé sei monu ba sira be halo vida nia objetivu prinsipál mak akumula soin sira. Kbiit, soin ne'ebé sira goza iha mundu ne'e sei serve ka lae, bainhira to'o iha juízu finál, momentu ne'ebé sei hatudu destinu definitivu ema nian?

Lae duni, Soin sira ne'ebé ema riku sira rai ho seguransa no esperansa, sei lakon nia folin hotu (kf. vers. 2-3a); piór liután, sai sasin ida akuzasaun nian, ne'ebé sei denunsia domin lahó kontrolu ba soin materiál sira, orgullu no autosufisiénsia, injustisa hasoru kiak sira. Destinu finál soin nian mak destruisaun; sé mak halo soin sira nia maromak, ka nia referénsia fundamentál sei la iha asesu ba vida nakonu no rohan-laek (vers. 3b.c).

Iha parte daruak, autór hateten katak ema riku sira nia soin mai husi explorasaun hasoru kiak sira. Ezemplu, la selu saláriu loos ba traballadór sira (vers. 4). Ne'e salan ida ne'ebé Lei kondena maka'as no Maromak sei fó kastigu boot (kf. Lv 19,13; Dt 24,15). La selu traballadór nia saláriu katak kondena ba mate nia no ninia família tomak (vers. 6). Luxu no ema riku sira nia ksolok mós mai hus kiak sira nia mate.

Naturalmente, Maromak la bele halo paktu ho injustisa, nune'e nia sei la indiferente ba ema kiak no terus sira nia halerik. Ho ironia nia kompara ema riku hanesan fahi ne'ebé ema hakiak tanba bokur loos, nia loron atu oho nian hakbesik lalais liu (vers. 5): hodi moris husi ema kiak sira nia mate, riku sira prepara sira-nia dalan ba desgrasa no kastigu.

Mensajen maka ne'e: sé maka moris ba soin materiál sira no tau sira-nia ezisténsia ba finalidade ne'e, difísil atu simu Maromak nia don sira no simu vida nakonu ne'ebé Maromak hakarak oferese ba ema sira. Husi parte seluk. Maromak la tolera explorasaun, opresaun kiak sira-nian; no se mak halo moris nune'e iha dalan injustisa nian, labele halo parte iha Maromak nia família.

EVANJELLU – Mc 9,38-43.45-47-48

Ita sei iha Cafarnaum (kf. Mc 9,33), sidade peskadór sira nian besik Bee-lihun boot Tiberíades nian. Jezús “iha uma laran” ho eskolante sira hale'u nia. Besik daudaun ona atu bá Jerusalém no eskolante sira konxiente katak tempu atu realiza sira-nia mehi kbiit nian besik mós. Maski sira hili Jezús sira hatudu katak sira seidauk absorve valór sira Reinu nian. Ba sira, tuir Jezús tenke konkretiza ho sira-nia mehi podér nian sai realidade, nune'e mós prestíjiu no hetan kadeira nian. Tanba ne'e maka sira la hakmatek no laran-moras se buat ruma impede sira nia autoridade, sira-nia priviléjiu.

Jezús ho pasiénsia, buka forma eskolante sira tuir lójika Reinu nian. Testu domingu ne'e nian propoin instrusaun ida tan Jezús nian ba eskolante sira katak presiza interioriza valór sira, se sira halarak integra an iha comunidade mesiánika.

MENSAJEN

Ita bele hetan tema oioin iha testu ne'e nian. Tema prinsipál maka iha parte dahuluk Evanjellu nian (hanesan tema leitura dahulukn)... Refere ba nesesidade atu comunidade sarani sai nakloke, hatene simu, tolera, aseita nu'udar Maromak nia sinál sira jestu sira libertadór ne'ebé akontese iha mundu.

Iha versíkulu dahuluk testu nian, João (porta-voz grupu nian ohin) kesar kona-ba faktu katak ema ida la'ós husi grupu eskolante nian duni sai diabu hodi Jezús nia naran; nia konsidera buat ne'e abuzu kona-ba Jezús nia naran husi ema ne'ebé la halo parte comunidade mesiánika, nune'e sira impede nia (vers. 38-41).

Eskolante sira-nia atitude hatudu, uluknanai, arrogánsia, sektarizmu, intoleránsia, laran-moras, laran-makerek, pretensaun atu monopoliza Jezús no ninia proposta, hanoin katak sira maka patraun/na'in ba lialoos no dadi'ak... Maibé iha reasaun nia kotuk konserteza iha preokupasaun boot atu realiza sira-nia projetu pesoál, prestíjiu no naran-boot nian. Molok ne'e sira diskute malu tiha ona kona-ba sé maka boot liu no sei okupa fatin importante iha Reinu, ne'ebé Jezús sei instala (kf. Mc 9,33-37); agora, sira la hakmatek no preokupadu, tanba ema ida husi li'ur mosu mai no pretende atua hodi Jezús nia naran, no bele iha tempu besik mai hadau fatin importante iha estrutura polítika Reinu nian.

Jezús buka lori eskolante sira atu ultrapasa tiha vizaun sektária no egoista misaun nian. Iha Jezús nia perspetiva, sé maka luta ba justisa no halo obra ba ema nia di'ak, nia hamutuk ho Jezús no moris dinámika Reinu nian, maski ho modu formál la horik iha estrutura eklesiál nia laran. Jezús nia comunidade la bele sai comunidade takan nian, eskluzivista, monopolizadora, ne'ebé sente laran-moras bainhira ema ruma husi li'ur halo di'ak; nia mós la bele sente lakon nia priviléjiu no direitu sira se Espíritu Maromak nian atua iha Kreda nia fronteira nia li'ur... Jezús nia comunidade tenkesér comunidade ida ne'ebe preokupasaun uluk liu maka ema nia di'ak; no tenke sai comunidade ida ne'ebé hatene hakohak, apoia no estimula ema hotu ne'ebé atua ba maun-alin sira nia libertasaun.

Iha parte daruak testu nian (vers. 42-48), ita iha Jezús nia liafuan seluk ne'ebé ko'alia kona-ba tema seluk. Ne'e mós indikasaun sira kona-ba atitude ne'ebé tenke iha atu tama iha comunidade Reinu nian. Sira mak espresaun ne'ebé husu atu hili loos, atu halo opsaun ho radikalidade ba valór sira Reinu nian.

Liafuan dahuluk mak avizu ida atu keta eskandaliza ki'ik sira (vers. 42). Iha ita-nia kultura eskandaliza katak hatudu ezemplu aat ne'ebé hakanek ema ne'ebé haree ninia sentimentu ka an rasik. Iha linguajen Marcos nian. "eskandaliza" iha signifikadu diferente... Verbu gregu "scandalizô" uza iha-ne'e, define hahalok atu deziste tuir Jezús. La iha korajen atu asume ninia proposta (kf. Mc 4,17; 8,35.38). Ki'ik sira ne'ebé Jezús dehan maka membru sira comunidade nian ne'ebé moris iha situasaun dependénsia nian, frakeza nian, nesesidade nian... Membru sira comunidade nian tenke hadook husi sira atitude sira ne'ebé bele lori ema ki'ik sira-ne'e atu hadook husi adezaun ba Jezús no dalan ne'ebé nia mai atu propoin. Halo buat ruma atu hadook ema sira ne'e ida husi Kristu no husi comunidade maka buat ruma aat liu ka labele akontese (di'ak liu tara fatuk iha kakorok no soe iha tasi laran – vers- 42).

Liafuan daruak Jezús nian (vers. 43-48) refere ba nesesidade atu fokit sai husi moris rasik sentimentu no atitude sira ne'ebé inkompativel ho opsaun ba Kristu no ninia proposta. Bainhira Jezús ko'alia kona-ba tesi liaman (liman iha kultura ne'e mak órgaun asaun nian, atu konkretiza fuan nia hakaran sira) ka tesi ain ka fokit matan nu'udar okaziaun ba salan (matan iha kultura ne'e, mak órgaun atu hakaran sira tama ba fuan laran), nia hakarak subliña maka'as, nesesidade atu atua, iha orijen/hun asaun ema sira nian no elimina salan sira husi kedas ninia hun ka abut sira. Husi ne'e maka depende ema nia destinu ikus, nune'e keta hein atu halo asaun importante

tesi nian ba atitude egoízmu nian no autosufisiénsia nian ne'ebé hadook ema husi Maromak no moris nakonu.

Iha liafuan daruka ne'e iha mós referénsia na “Geena”, “iha ne'ebé ular-oan la mate no ahi mós la nahas” ba sira ne'ebé lakohi tesi kotu atitude sira no sentimentu inkompativel ho tatuir Jezús nian. Liafuan “Geena” maihusi ebraiku “Ge Hinnon” (“Laletek Hinnon nian”). Refere ba laletek ida iha sudoeste Jerusalém nian, iha-ne'ebé hakoi mate sira no iha-ne'ebé ema sunu foer sidsde nian loron-kalan. Nune'e fatin ne'e fatin malisan nian, foer nian, nakukun aat nian, ne'ebé tenke evita.

Jezús uza ilas “Ge Hinnon”, atu ko'alia kona-ba moris ne'ebé lakon tiha, moris frustradu, moris ne'ebé rahun, moris malisan nian, moris lahó sentidu. Sé mak la iha kapasidade atu tesi ka fokit sai egoízmu, orgullu, autosufisiénsia, nia kondena an atu moris iha “Ge Hinnon”.